

Menos di 12 ora despues di conferencia di Ministro...

Dompig a expresa cu Jan van der Straten ta keda na cabez di investigacion

ORANJESTAD (AAN): Reaccion a drenta, despues di loke a tuma lugar Diabierna anochi, unda Halto Comisario Dompig a acudi na sede politico di Ministro di Husticia, unda e titular di husticia posiblemente mal informa, a expresa cu e Halto Comisario Jan van der Straten a worde hala un banda for di e team investigador. Ministro kier a hala Jan van der

Straten un banda, djis debi cu e lo a bisa na prensa internacional, cu e tres hobennan di interes den caso di Natalee Holloway, ta "tres local", y esey no a cay den bon tera.

Esaki a worde cuestion debi cu Ministro ta insisti cu ta trata aki di un hoben Hulandes y dos Surinameño, y cu na su opinion, mester a detene nan.

Mirando cu ta trata aki di un

caso serio y e meta principal ta pa localiza e mucha muher Mericano mas pronto posible pa trece un claridad, e expresion aki no a cay den bon tera.

No ta Ministro ta dicidi kende ta forma un team investigador! Ta e oficial halto di Ministerio Publico ta dicidi esey. Pa colmo, aworaki no tin motibo pa trece 'discordia' den Cuerpo Policial tampoco.

Corda bon, cu gruponan local entre otro Team Special, Polis uniform, Mariniernan Hulandes, Search & Rescue Aruba, Flexi Team, Guardacosta di Aruba y Antiya, Warda Nos Costa, personal di FBI tambe, ta trahando hunto pa localiza Natalee.

Esaki ta un team cu realmente ta Fiscal Mayor ta dicidi kende ta den e team! Segun informe,



nan a keda sorprende cu e conferencia di prensa relampago di Diabierna anochi laat. Pasobra nan tin varios dia caba ta kibrando cabez cu e caso aki, y awor Ministro tambe ta hinca sauce den e stress.

Pa colmo, DIARIO ta ripiti cu varios agente policial a keda nada contento, cu Comisario Dompig a aparece den un sede politico pa tene conferencia di prensa, unda Ministro a manera pone su man di bendicion riba cabez di dje, cu e instruccion pa e bay dirigi e Team aki.

Ni 12 ora despues, diripiente un cambio radical a presenta!

Diasabra mainta mes, Comisario Dompig a manera 'pidi dispensa' den un comunicado cu el a e-mail pa casi henter Cuerpo Policial.

El a bisa cu el a participa na e conferencia di prensa di Diabierna anochi solamente cu e meta pa duna informacion rond di e caso di Natalee, unda cu Ministro lo haya necesario.

Pero el a subraya cu e caso di desaparicion di Natalee ta worde investiga bao mando di Comisario Jan van der Straten en cooperacion cu Fiscal Mayor.

Dompig a bisa cu no tin ningun motibo pa duda na e direccion cu e caso aki ta tumando, y pesey a desea di distancia su mes di tur declaracion cu a worde haci al respecto.

Mirando back despues, Dompig ta haya cu ta accidentalmente cu e conferencia di prensa tabata na un sede politico, pero e ta segura Polisnan cu aki no tin ningun interes den wega, sino cu e investigacion.

Informacion ta muestra cu awe den transcurso di dia, e caso aki lo por worde trata tras di porta sera entre alto mando cu su staf, ainda e ultimo palabra no a cay ainda.

Korpchef mr Bernadina a regresa for di exterior durante weekend y ta bin haya den un situacion caminda kier bula cabez di "Jan" awor tras di cortina.

Sindicato SPA di acerca ta sigui e acontecimiento pa nan bay duna nan opinion. Y manera cos ta pinta, cu 99 porciento ta para tras di "Jan" hasta por tribi di menciona Ministerio Publico tambe.